

**Вилоят ҳокимининг матбуот хизмати.**

# ПРЕЗИДЕНТ МАСЛАХАТЧИСИ ҚЎРИҚХОНАЛАРНИ ОРАЛАДИ

**ҚР Президентининг маслаҳатчиси – Халқаро экологик ҳамкорлик бўйича махсус вакили Зулфия Сулейменова Кентов шахрига ташриф буюрди.**

Сафар доирасида вилоят ҳокимининг ўринбосари Ертай Алтаев ҳамроҳлигида шаҳардаги давлат муҳофазасига олинган табиий ҳудуди – “Қаратау” қўриқхонаси фаолияти билан атрофлича танишди. Қўриқхона маъмурияти томонидан ҳудуддаги экологик вазият, ўсимликлар ва ҳайвонот дунёси, уларни муҳофаза қилиш борасида олиб борилаётган ишлар юзасидан атрофлича маълумот берилди. Статистик маълумотларга кўра, ҳудудда 1221 ўсимлик тури мавжуд, улардан 59таси “Қизил китоб”га кирган. Қўшларнинг 127 туридан 12таси “Қизил китоб”га киририлган. Шунингдек, умуртқасиз жонзотларнинг 1345 тури мавжуд бўлиб, улардан 16таси махсус муҳофазада. Мамлакатимиздаги архарнинг 5 туридан бири – Қаратау архари ушбу ҳудудда яшайди.

Зулфия Бўлатқизи Давлат раҳбарининг топшириғига мувофиқ, биохилма-хилликни сақлаш – миллий даражадаги устувор вазифа эканини таъкидлади. Шунингдек, Халқаро даражада биохилма-хилликни муҳофаза қилиш жамғармаси ташкил этилаётганини маълум қилди. Ушбу ташаббус қўриқхоналарнинг илмий ва амалий фаолиятини янада кучайтириш билан



бирга экотуризм муҳим омилга айланишни қайд этди.

Сафар давомида, меҳмонлар қўриқхонадаги тарихий жойга – “Хон тоғи”нинг бир қисмига ташриф буюришди ва у ердаги табиат билан танишишди. Бундан ташқари, лаборатория иши билан танишиб, қўриқхона ходимлари билан суҳбатлашишди. Бу ерда камёб ҳашаротлар сақланади ва тадқиқот ишлари олиб борилади.

Шу куни Президент маслаҳатчиси

Туркистон шахридаги “Ёшлар истироҳат боғи” ва “Сирдарё-Туркистон” давлат минтақавий табиат боғида бўлиб, амалга оширилаётган ишлар билан танишди.

Мазкур боғлар экологик тарғибот, аҳоли онгини юксалтириш ва яшил муҳитни кенгайтириш борасида муҳим аҳамият касб этади.

**Вилоят ҳокимининг матбуот хизмати.**

## БЮДЖЕТ БАРҚАРОРЛИГИ – ТАРАҚҚИЁТ ТАЯНЧИ



**Вилоятда 2024 йилнинг натижасига кўра, ялпи минтақавий маҳсулот 4,5 трлн. тенгегга етди, аниқ ҳажм кўрсаткичи 2023 йилга нисбатан 108 фоизни ташкил этди. Умумий ҳудудий маҳсулот таркибида маҳаллий даромадлар улуши 4,9 фоизни ташкил қилди.**

Вилоят ҳокими Нуралхан Кўшеров раислигида ўтган йиғилишда маҳаллий даромадларни ошириш масаласи муҳокама қилинди. Вилоят раҳбари мутасадди бошқармалар раҳбарлари, туман ва шаҳар ҳокимларига ишлаб чиқариш корхоналарини очиш, маҳаллий даромадлар ва солиқ тушумларини кўпайтиришга доир ишларни жонлантиришни топширди.

Мажлисида вилоят иқтисодиёт ва бюджетни лойиҳалаш бошқармаси раҳбари

Қанат Қайипбек ва Туркистон вилояти бўйича Давлат даромадлари департаменти раҳбари Мақсат Нурахаевнинг ҳисоботи тингланди.

Маъмурлаштирув ишлари натижасида бу йил 6 ой натижаларига кўра, солиқ даромадлари бўйича вилоятда юсалиш даражаси 132,3 фоизни ташкил этиб, минтақа республика миқёсида 1-ўринга чиқди.

Бинобарин, солиқ соҳасида ҳали анча долзарб масалалар бор. Ушбу муам-

молар очиқ айтилди. Масалан, хусусий болалар боғчалари сони давлат болалар боғчаларига нисбатан бир неча баравар кўп бўлса-да, солиқлари бир хил даражада қолмоқда. Шунингдек, Тўлебий, Сарюғоч туманларида дам олиш масканлари сони ортиб бораётган бўлса-да, солиқ тушумларида сезиларли ўсиш кузатилмайд.

Ушбу камчиликларни бартараф этиш, хуфёна иқтисодиётни қисқартириш ва ҳар бир даромад манбаини ҳисобга олиш юзасидан аниқ вазифалар юкланди.

**Вилоят ҳокимининг матбуот хизмати.**

**ВИЛОЯТ МАРКАЗИДА  
СОЛИҚ ТУШУМЛАРИ  
ВА МАҲАЛЛИЙ  
ДАРОМАДЛАРНИ ОШИРИШ  
МАСАЛАСИ КЎРИЛДИ**

## ДЎСТЛИК КАРВОНИ – САЙРАМ ВА ТЎЛЕБИЙ ТУМАНЛАРИДА



Тадбирда Қозоғистон халқи Ассамблеяси аъзолари, маҳаллий Оқсоқоллар ва Оналар кенгашлари вакиллари, шунингдек, турли этносларга мансуб ёшлар иштирок этдилар.

“Дўстлик карвони”нинг асо-

сий маърузачилари сифатида ҚХАнинг 2030-йилгача мўлжалланган Концепциясини ишлаб чиқиш бўйича ишчи гуруҳ аъзоси, вилоят ҚХА қошидаги илмий-таҳлилий гуруҳ раҳбари, филология фанлари доктори, профессор Сейдулла

Садиков ҳамда вилоят ҚХА қошидаги Оқсоқоллар кенгаши раисининг ўринбосари Бахтиёр Аширлиев маъруза қилдилар. Улар мамлакатдаги бирлик ва тотувлик, этносларро ҳамжиҳатликни сақлаш, дўстлик асосларини мустаҳ-

камлаш ҳақида сўз юритдилар.

Тадбир қатнашчилари ҳам ўз фикр ва мулоҳазаларини баён этишди. Йиғилиш давомида этнослараро муносабатларни янада мустаҳкамлаш, тинчлик ва осойишталикни сақлаш, ёшлар тарбияси, заррли гоёлардан сақланиш ва кенгашлар фаолиятини янада жонлантириш масалалари муҳокама қилинди, қатнашчилар томонидан берилган саволларга жавоблар тақдим этилди.

“Дўстлик карвони” лойиҳаси Тулкибош туманида давом этди.

Этнослараро муносабатлар, маданиятлар уйғунлиги, фаол фуқаролик нуқтаи назари – буларнинг барчаси жамиятда тинчлик ва тотувликни таъминлашда ҳал қилувчи омиллардир. Шу маънода, “Дўстлик карвони” лойиҳаси нафақат ташриф, балки халқ қалбига нур улашувчи, тинчлик фалсафасини тарқатувчи саъй-ҳаракатдир.

Ҳар бир сўз, ҳар бир мулоқот, ҳар бир самимий учрашув ортида меҳр бор, ҳурмат бор, энг муҳими – халқ ва давлат ўртасидаги ишонч бор.

**А. АБДУФАТТОҲ.  
Муаллиф тасвирлари.**

Ўзбек, қирғиз, қozoқ – сартимсан, уйғур, татар, туркман – туркимсан,  
Тожиқ, озор, ўғуз ўзингсан, бир Онадан тарқагандирсан.  
Бир-бирингдан ажрамагин ҳеч, гина-қудрат, ғанимликдан кеч,  
Туғунларни биргалашиб еч, оғаларим кеч бўлмасин кеч.  
Қаддинг кўтар, Она Туркистон, йиллар ўтар, қара, Туркистон!

**Қўшиқдан.**

*Туроннинг тонгини  
мунаввар айлаган  
дўстлик*



Қадим юртим, бахт бешигим – кўхна Туроним! Бу сўзлар нафақат шеърий сатрлар, балки қалбимиздан ўрин олган ғурур ва ифтихор ифодаси ҳамдир. Ушбу муқаддас ном атрофида минг йиллар давомида турли халқлар ягона мақсад, ягона орзу йўлида яшаб, оғир дамларда елкадош бўлиб, тараққиёт йўлида елка бериб ҳаракат қилган.



Бугун Қозоғистон – шу азиз заминнинг, буюк Туроннинг сиёсий, иқтисодий ва маънавий меросини муносиб давом эттираётган юртдир. Давлатимиз – минтақавий ва дунёвий миқёсдаги муҳим ташаббуслар, халқаро ҳамжиҳатлик сари қадам ташлаётган ва жаҳон дипломатияси саҳнасида муносиб ўринга эга бўлган мустақил мамлакатдир.

ҚР Президенти Қасим-Жўмарт Тўқаевнинг халқаро майдондаги теран сиёсий диди ва халқаро нуфузи орқали Қозоғистон жаҳон давлатлари билан самарали мулоқотни йўлга қўйиб, дунёвий муаммоларга ечим топишда фаол иштирок этмоқда. Аниқса, мамлакатимиз етакчисининг нуфузли халқаро анжуманларда билдирган қарашлари, тинчлик ва дўстлик сари даъватлари ҳар бир фуқаронинг қалбида фахр ва ифтихор туйғуларини уйғотади.

Давлат раҳбари таъкидлаганидек, «Қозоғистоннинг бойликлари кўп, лекин энг улкан бойлигимиз – миллатлараро тотувлик, тинчлик ва ҳамжиҳатликдир».

Бугун мамлакатимизда турли миллат ва элат вакиллари тинч, осойишта ҳаёт кечирмоқда. Уларнинг ҳамжиҳатлиги, ўзаро ҳурмати ва бирдамлиги Қозоғистоннинг барқарор тараққиётини таъминлаётган асосий омиллардан биридир.

Бу эзгу фазилатлар тасодиф эмас – улар тарихий замин ва қадим анъаналардан озикланади. Бағрикенглик, меҳмондўстлик ва ўзгага ҳурмат халқимизнинг қонига синган, эл қалбини ёритувчи маънавий нурдир. Бу фазилатлар замонамизнинг маънавий устун, тинчлик ва тотувлик пойдеворидир. Ана шундай қадриятлар туфайли юртимизда дўстлик ва ҳамжиҳатлик муҳити қарор топган. Минг йиллар давомида Буюк Ипак йўлида жойлашган юртимиз маданиятлар кесишган нуқта бўлган, шу боис миллатлар орасидаги ўзаро тушуниш, маданий ҳамкорлик чуқур илдиз отган.

Бугунги кунда ушбу қимматли фазилатларни асраб-авайлаш, бойитиш мақсадида Қозоғистон халқи Ассамблеяси фаолият олиб бормоқда. Ассамблея – мамлакатимиздаги этномаданият бирлашмалари учун асосий пойдевор, уларнинг тили, маданияти, урф-одатлари, миллий хунармандчилиги ва санъатига муносиб эътибор қаратиладиган кенг имкониятлар майдонидир. Шу орқали барча миллатлар ўртасидаги дўстлик, тотувлик ва ўзаро ҳурмат муҳити янада мустаҳкамланмоқда.

Зеро, юртимизда ҳар бир миллат ўзини эркин ва тенг ҳуқуқли фуқаро сифатида ҳис этади. Улар ўртасидаги муносабатларда ҳам дўстлик ва бағрикенглик руҳи устувор. Турли халқлар маданияти бир-бирини бойитишда давом этмоқда. Бу жараён нафақат миллий, балки умуминсоний қадриятлар ривожига хизмат қилмоқда.

Шу маънода, шоир ва ёзувчиларнинг кўп тилда ижод қилиши, жаҳон адабиёти намуналарини таржима қилиши, турли маданиятлар ўртасидаги маънавий кўприкларни барпо этиши – бу ҳам этномаданиятнинг муҳим бир йўналишидир. Ҳар бир тилдаги шеъриятда, ҳар бир тилдаги асарда умумий туйғулар яшайди – севги, меҳр, бағрикенглик, ватанпарварлик.

Қозоғистонда илгари сурилаётган «Келажаги ягона миллат» ғояси юксак маъно ва мазмунга эга. Бу ғоя халқлар ўртасидаги бирлик ва ўзаро ишончни мустаҳкамлайди, мамлакатдаги сиёсий барқарорлик ва ижтимоий бирдамликни таъминлайди.

Чунки дўстлик ва биродарлик – бу тарих синовларидан ўтган, бизнинг эл учун ҳамиша қадрили бўлган тушунчалардир. Дўстлик бор жойда барака бўлади, бирлик бор жойда тараққиёт бўлади.

Агар биз оламга назар ташласак, кўрамизки, куёшнинг илк нурлари ҳам айнан Турон заминини илитади, ўзининг бутун тафти, меҳри, қудрати, орзу ва ҳавасини бошида қор, дилида баҳор бўлган муқаддас, толеи баланд бўлган она Туркистонга тўкиб солади. Шу боис ҳам бу заминнинг ҳавоси беғубор, ер-суви серҳосил, халқи эса ор-номусли ва улуғвор. Бу юртнинг дўстлик, бағрикенглик ва ҳамжиҳатлик нурлари дунёга мунаввар ёғдуларини сочиб келмоқда.

**А. АБДУФАТТОҲ.**

# МАРДЛИК САБОҚЛАРИ – ЭЛ ҚАЛБИДА

Бу йил Буюк Ғалабанинг 80 йиллигини муносиб нишонладик. Она Ватан озодлиги учун жонини фидо қилган, фашизмга қарши сафда туриб, жасорат кўрсатган ота-бобларимиз, фронт ортида меҳнат қилган ҳамюртларимизнинг хотираси юртимиз бўйлаб алоҳида эҳтиром билан ёдга олинмоқда.

Орадан йиллар ўтса ҳам, жанг майдонларида ғалаба байроғини баланд кўтарган, ғалабага меҳнат жабҳасида ҳисса қўшган мардлар хотираси эл оғзидан тушмайди. Чунки улар ўз жасорати билан нафақат тарих яратдилар, балки юртимизга тинчлик ва эркинликни олиб келишди.



**ИСРОИЛ ЖУМАНОВ – ҚАҲРАМОНЛИК ТИМСОЛИ**

1920 йилда туғилган Исроил Жуманов 1941 йилда армия сафига қақирилиб, қисқа ҳарбий тайёргарликдан сўнг, сержант унвонини олди. У миномётчилар бўлинимаси командир сифатида 1943 йил июнь ойида Москва остонасидаги жанглarda иштирок этди. Вязма, Калуга, Смоленск шаҳарларини ҳам душмандан озод этишда қаҳрамонлик кўрсатди. Яраланди. Соғлиги тиклангач, сафга қайтиб, 192-дивизиянинг 76-полк командири сифатида душманга қарши жангга киради. Ростов, Одесса шаҳарлари, сўнг Латвия, Молдавия шаҳарларини душмандан озод қилишди. Ана шу жанглarning бирида яна оғир яраланиб, бир оғидан жудо бўлган Исроил Жуманов она қишлоғига қайтади.

У тинч меҳнат фронтида ҳам ҳалол меҳнати билан эл ишончини қозонган юрт фахрийси эди.

**САЙДИЛЛАХОН ЗАББАРҲОНОВ – ЛЕНИНГРАД МУДОФААСИ ҚАҲРАМОНИ**

Ҳарбий хизматга қақирилганда Сайдиллаҳон Заббар-



хонов 38 ёшда эди. Ҳарбий тайёргарликдан сўнг, у Ленинград мудофаачилари қисмига жўнатилди. Қўл пулемётини усталик билан бошқарган жангчи дастлаб Ленинград мудофаасида, сўнг ҳужум жангларида қаҳрамонлик кўрсатди. Узоқ муддат қамалда қолган шаҳар билан алоқани тиклашда жонбозлик кўрсатди. Бир неча фашистни тор-мор келтириб, тўрт нафар душмани асирга олди. Оғир яраланиб, шифохонада даволанди, сўнг она қишлоғига қайтарилди. Унинг барча ҳужжатлари жанг майдонида йўқолди, аммо унинг кўксини бир неча жанговар нишонлар безаб турарди. У 1985 йилда вафот этди.

**МАЪРУФЖОН ЗОКИРОВ – “ҚИЗИЛ ЮЛДУЗ” ОРДЕНИ СОҲИБИ**

Сайрамлик жангчи Маъруфхон Зокиров 1920 йилда туғилган. 22 ёшида ҳарбий хизматга қақирилиб, Ғарбий фронт қўшинлари сафида Смоленск шаҳрини фашистлардан озод қилишдаги жанглarda қатнашди. Пулемёт билан ёвни тўхтатиб, жасорат кўрсатгани учун М. Зокиров “Жасорати учун” медали билан тақдирланди. Ана шу жанглarning бирида яраланиб, госпиталда даволанди. Сўнг 3-Белоруссия



фронти қўшинлари сафида Витебск шаҳрини озод қилишдаги жасорати учун “Қизил Юлдуз” ордени билан тақдирланди. Навбатдаги жанглarda Белоруссия, Литва ва Латвия республикаларини озод қилишда фаол иштирок этди. У Ғалабани Литвада кутиб олди.

1945 йил декабрида она қишлоғига қайтиб, деҳқончилик соҳасида улкан довопларни забт этди. Унинг жанговар нишонлари қотрига “Меҳнат Қизил Байроқ” ордени ҳам қўшилди.

Бугунги кунда ортида қолган авлоди унинг хотирасини ифтихор билан ёдга олишади.

**ХОТИРА – МУҚАДДАС, ҚАДР – АБАДИЙ**

Бугунги тинч ва осойишта ҳаётимизга замин яратган улуг ва табаррук авлодга ҳар қанча миннатдорчилик билдирсак ҳам кам. Уларнинг жасоратидан ҳаёт дарсини ўрганиш, ватанпарварлик маънавиятини келажақ авлод қалбига синдириш, барчамиз учун муқаддас бурч. Бугунги ёшларимиз учун бу қаҳрамонлик тимсоли, ибрат намунасидир.

Жасур оталаримиз хотирасига таъзим бажо келтирамыз.

**Мухтабар УСМОНОВА.**

## Умр – неъмат, виждон – омонат

Инсон умри – Яратган томонидан берилган энг улуг, энг нодир неъматлардан биридир. У тўхтовсиз ҳаракатдаги соат сингари кечади. Шунинг учун ҳам ажодларимиз: “Вақт – олтиндан ҳам қиммат”, деб бежиз айтмаган. Ҳаёт ғоят тез ўтади. Аммо бу тезликда ҳар бир фурсатни ғанимат қилиб яшаш, бор неъматга шукроналик ила ёндашиш – маънавий камолотимизнинг асосий тарозисидир.

Бугун сиз тонг отиши билан уйғондингиз. Тўрт мучангиз соғ, кўзингиз нурли. Сиз атрофингиздаги гўзал дунёни, ҳалол रिқ билан безанган дастурхонингизни кўрдингиз. Бунинг ўзи катта неъмат эмасми? Қора қозонингиз қайнаб турибди. Яқинларингиз бағрингизда, юрт осмони мусаффо. Шундай тинч, фаровон ҳаётни насиб этгани учун шукрона қилишни ўзимизга бурч, деб билишимиз даркор.

Шукроналик – қалбни мусаффо, виждонни пок сақлайди. Киши шукр қилган сари, тинчликка ҳисса қўшган сари, яхшиликлар ўз-ўзидан зиёда бўлиб бориши турган гап. Чунки халқимизнинг тафаккурига “Хайр бор жойда – ҳосият бор” деган ғоя сингдирилган.

Афсуски, ҳаётда шундай инсонлар ҳам учрайди. Улар гўёки бахт қалити қўлида, деб ўйлайди. Бойликни мақсад, мансабни эса бахтнинг ўлчови деб билувчи ана шундай кишилар кўз ўнгиде тинчлик, соғлиқ, руҳий барқарорлик қалби энг азиз неъматлар аризмас кўринади. Ваҳоланки, ҳар бир кунимиз – юксак қадрга лойиқ тухфадир.

Кўзимиз билан оламни кўраётган эканмиз, қулоғимиз билан болалар шодлигини эшитяпмиз, юрагимизда меҳр ва муҳаббат бор экан – бу бахт эмасми? Ҳолбуки, айрим инсонлар борки, улар бутун умр тийилмас зулмат бағрида яшайди. Ёки бутун ҳаётини аравачага боғлаб ўтказди. Шундай инсонлар олдида биз ўз ҳаётимиз учун шукрона қилишни унутмаслигимиз керак.

Янги Қозоғистон – бу нафақат бунёдкорлик, балки инсон қалбини обод этишга қаратилган маънавий қурилишдир. Бугунги кунда фуқароларнинг ҳаёти, ҳуқуқлари, қадри ва шаъни энг устувор қадрият сифатида этироф этилапти. Шундай юрда яшаш, бундай давлатнинг фарзанди бўлиш – ҳар биримиз учун ифтихордир.

Энг муҳими, биз бу юрда ўз тақдиримизни ўз қўлимиз

билан ёзиш имкониятига эгамиз. Бу – эркинлик, бу – иход, бу – раvнақ сари бошланган буюк йўл.

Хулоса ўрнида айтадиган бўлсак: умр – неъмат, виждон – омонат. Бу неъматга хиёнат қилмаслик, бу омонатни ифлос фикрлар, манфаатпараст ниятлар ила булғамаслик – ҳар бир онгли инсоннинг бурчидир.

Шошилма, инсон! Бугунги тезкор замонда ҳар бир қадам, ҳар бир нафас шошилиш билан узвий боғлиқдек туюлади. Аммо инсон зотиға яраша ҳаёт на шошилиш, на ўзини йўқотиш билан баҳоланмайди. Ҳаёт Оллоҳ томонидан берилган бебаҳо неъмат, унинг ҳар лаҳзасида маъно, муҳаббат ва шукроналик мавжуд.

Шошилиб, юракни чарчатиб, вақтини ортиқча эҳтирос ва хавотир билан ўтказган инсон ҳаётнинг ҳақиқий мазмунидан маҳрум қолади. Зеро, юракнинг сукутида, тафаккурнинг сокин оламида ҳаётнинг тиниқ манбаи яшайди.

Ҳар бир кунга шукр қилиб яшаш – руҳиятнинг озукасидир. Шукрона туйғуси бўлган юрак учун барча эшиклар очилади, ўша хонадондан барака кетмайди.

**С. МИРЗО.**

## МӘМС жүйесінде не өзгерістер бар?

Егер сіз ресми түрде жұмыс істемесеңіз және МӘМС жүйесінде сақтандырылмаған болсаңыз, мәртебені бір жылға қалай ала аласыз?

Бұрын жүйеде “сақтандырылған” мәртебесі соңғы 12 айға жарналар толық төленсе ғана берілетін. Осы кезеңде тіпті бір айға жарна төленбесе, қарыз пайда болып, оны өтеуге тура келетін.

Ал қазір МӘМС туралы заңға енгізілген өзгерістерге

(05.09.2022 ж.) сәйкес, өткен жылдың қарызын өтемей-ақ, алдағы бір жылға сақтандырылу мәртебесін алуға болады.

Ол үшін келесі 12 айға жарналарды алдын ала төлеу қажет.

Есіңізде болсын: әр ай үшін 4250 теңгеден жеке-жеке төленуі тиіс. Яғни жарнаны бір жолғы сома ретінде төлеу қате болып саналады, сондықтан мәртебе берілмейді.

Сақтандыру мәртебесі сізге дәл осы айда қажет болса, жылдық кезеңді осы айдан бастаңыз.

Жарналарды банк кассалары, мобильді қосымшалар, төлем терминалдары және “Қазпошта” бөлімшелері арқылы төлеуге болады.

**Махаммаджан ҚЖУМАНОВ, “Ақ Ниет Plus” ЖШС медицина орталығы директоры.**

### »» Ёднома

# ЭЛ ДАРДИ БИЛАН ЯШАГАН ИНСОН – ЮРАКЛАРИМИЗДА АБАДИЙ

Ардоқли инсон, фидокор жамоат арбоби Қувонч Абдураҳмоновнинг вафоти ҳақидаги қайғули хабар юртимиз аҳли қалбига оғир ботди.

Қувонч оға – Сайрам туманида юртдошлар дардига бефарқ бўлмаган, одамайлиги ва юксак одоб-ахлоқи билан меҳр қозонган ардоқли шахс эди. У киши



**Меҳнат фахрийси, узоқ йиллар Сайрам диёрида фахрийлар Кенгашининг раиси ва қишлоқ тўбейий сифатида хизмат қилган элга таниқли шахс Қувонч Абдураҳмонов оламдан ўтди...**

У 1934 йилда Сайрам қишлоғида туғилди. Болалигидан меҳнатда тобланиб, қарийб ярим аср Сайрам туман матлубот жамиятига қарашли турли корхоналарда фаолият юритди. Нафақага чиққач, жамоат ишларида фаолият кўрсатиб, қишлоқдаги кўплаб ижтимоий муаммоларни ҳал этишда жонбозлик кўрсатди. Қувонч Абдураҳмонов қарийб 20 йил мобайнида Сайрам қишлоғининг тўбейий сифатида эл раvнақи йўлида самарали меҳнат қилди.

Айниқса, мустақилликнинг дастлабки йилларида аҳолини сув, газ ва электр энергияси билан таъминлаш, фуқароларга сифатли тиббий хизмат кўрсатиш ва уларни озиқ-овқат маҳсулотлари билан таъминлашда жонбозлик кўрсатди, кўплаб хайрли ишларнинг бошқошида бўлди. У ҳар йили Буюк Ғалаба байрами арафасида УВУ қатнашчиларининг хона-

нафақат маҳаллий даражада, балки вилоят миқёсида ҳам юксак обрўга эга шахс бўлиб, юрт ижтимоий-иқтисодий тараққиётига ҳисса қўшган ардоқли фуқаролардан бири бўлган.

Жанубий Қозоғистон вилоятига раҳбарлик қилган йилларда у инсон билан танишган эдим. Шу йилларда у қишлоқни ривожлантириш тадбирларида фидойилиги билан элнинг эътиборини қозониб, йирик лойиҳалар ижросини таъминлашга залворли ҳисса қўшган эди.

Марҳумнинг ортида қолган эзгу излар, халқ дарди билан яшаган ҳаёти, келажақ авлодга ибрат бўлиб қолади. У кишидан қолган мерос бу фақат хотира

эмас, балки умуммиллий қадриятларнинг амалдаги намунасидир.

Азиз инсоннинг вафоти барчамиз учун катта йўқотишдир. У зотнинг нурли сиймоси, фидокорона хизматлари ва инсоний фазиаллари доимо ёдимизда яшайди.

Марҳумнинг яқинлари ва оила аъзолари дардини юракдан ҳис этиб, чуқур таъзия изҳор қиламиз.

Хотираси абадий, номи барҳаёт бўлсин.

**Бейбит АТАМҚУЛОВ, Қозоғистон Республикасининг Ўзбекистондаги элчиси.**

# ЭЛ ЖОНКУЯРИ ВА ФИДОЙИСИ ЭДИ

донларида бўлиб, уларга совға-саломлар улашар, ҳурмат ва эҳтиром кўрсатар эди.

Қ. Абдураҳмонов тўбейийлик фаолияти мобайнида Сайрам қишлоғи учун долзарб масалаларни вилоят ҳамда туман ҳокимлари олдида кўтариб, ҳал қилишга залворли ҳисса қўшганди. Жумладан, унинг ташаббуси билан Ленин номили жамоа хўжалиги тасарруфидеги “Қизилсув” сихатдоғи хусусийлаштирилишига йўл қўйилмай, фахрийлар учун “Мейёр” дам олиш уйига айланттиришга эришилди. Шунингдек, қишлоқ марказидаги УВУ қатнашчиларининг хотирасига қад ростлаган “Номълум жангчи” ёдгорлиги қайта таъмирланди, қўш қаҳрамон З. Хусанов ва Б. Содиковларнинг ҳайкалчалари ўрнатилди. Бу жойда кўкаламзорлаштириш ва ободонлаштириш ишлари олиб борилди.

Дарҳақиқат, мутасадди ташкилотларга мурожаат қилиб, камчиликларни рўй-рост айтиш ва бирон натижани талаб қилиш учун инсон метин иродали ва довюрак бўлиши жоиз. Қувонч ота мана шу хислатлари билан эл орасида обрў-эътибор қозонган эди.

Унинг жамоат ишларидаги

фаолияти ҳамда кўп йиллик самарали хизматлари муносиб баҳосини олди. Қ. Абдураҳмонов “Қўрмет” ордени, “ҚР Мустақиллигига – 20 йил” медали, ҚР Президентининг “Қўрмет грамотаси”, “Нур Отан” партияси, вилоят ҳокимининг фахрий ёрлиқлари, “Улуғ Ватан урушидаги Ғалабага – 60 йил”, “Улуғ Ватан урушидаги Ғалабага – 65 йил”, “Елеули еңбегі үшін” медаллари билан тақдирланди. У “Сайрам туманининг фахрий фуқароси” унвони, вилоят “Йил одами” ва “Намунали қишлоқ бийи” номинацияларининг соҳибни бўлган эди.

Қувонч Абдураҳмоновнинг ёрқин хотираси, амалга оширган эзгу ишлари унутилмайди. Унинг ҳаёт йўли ёшларга ибрат ва намуна бўлиб қолади. Ушбу мусибатли кунларда марҳумнинг оила аъзолари, қариндош-уруғлари ва яқинлариға ҳамдардлик билдирамыз. Илоийм, охиратлари обод, жойлари жаннатда бўлсин!

**Сайрам туман матлубот жамияти ходимлари ва фахрийлари номидан: Турегелди Қалмуратов, Ермен ҚАЙРАТ, Икром ЗАЙНУДДИНОВ, Пернали МАМБЕТАЛИЕВ, Собиржон ТУЛАМЕТОВ.**

# НУР ТАРАТИБ ЎТГАН УМР

Инсон қалбиде эзгулик уфурган нур қолади. У нур вақти келиб майдонға чиқади. У шундай зотлардан эди...

Қозоғистондаги ўзбек зиёилилари жамияти, кенг маънода бутун мамлакатимизнинг маърифатпарвар қатлами оғир мусибатни бошидан кечирди. Юксак тафаккур, халқчиллик, теран билим ва ибратли ҳаёти билан эл ва жамият ҳурматиға сазовор бўлган фидойи устоз-муаллим, баркамол инсон, халқ дарди билан яшаган меҳрибон аёл – Нуринисо (Нурхон) Дўсматова оламдан ўтди.

У нафақат устоз, балки замоннинг тимсоли эди. Унинг ҳаёти, ижтимоий-илмий фаолияти ва қалб юрагида ёнадиган эзгулик чироғи – бугунги авлод учун ибрат мактаби бўлиб қолади.

### ҲАЁТ ЙЎЛИ – ЗИЁ ЙЎЛИ

1956 йили Шимкент шаҳридаги зиёилилар хонадониде таваллуд топан Нуринисо Дўсматова болалиқдан илмға мушарраф, жамиятға садоқат туйғулари билан камолға етди. У ўз илмий салоҳиятини Ўзбекистоннинг нуфузли олий ўқув юрти – Фаргона шаҳридаги Мирзо Улуғбек номидаги давлат институтиде мустаҳкамлади.

Фаолиятини Шимкентдаги ўзбек мактабларида бошлаб, йиллар давомиде нафақат ўқитувчи, балки ўқув-услубий ишлар бўйича раҳбар лавозимларида фаолият юритди. Унинг қаламиға мансуб 5-11-синфлар учун “Ўзбек тили” дарсликлари, ўрта муддатли режалар, дарс ишлариға доир дастурлар ва ўқув қўлланмаларидан хозирги кунда ҳам юзлаб ўқитувчилар фойдаланмоқда. Унинг “Навоийшунослик” фанидан тузган дастури, услубий мақолалари таълим соҳаси учун муҳим манба ҳисобланади.

41 йиллик фаолияти давомиде Нурхон Дўсматова наинки билим, балки маънавият, таълим-тарбия билан машғул бўлди. Ўзбек мактабларида ўз ўрни ва обрў-эътиборига эга эди.

**ЖАМИЯТ ХИЗМАТИ – ҚАЛБ СИНОАТИ**

Нурхон Дўсматова нафақат таълим соҳасида, балки жа-

миятда энг оғир ва масъулиятли вазифаларни ҳам зиммасига олган эди.

У Қозоғистон ўзбеклари “Дўстлик” ҳамжамияти раисининг маданият, таълим ва гендер масалалари бўйича ўринбосари, шунингдек, Шимкент шаҳар Ал Форобий тумани ЎЭМБнинг фаол ва ташаббускор раҳбарларидан бири эди.

“Биз – бир халқмиз”, “Тилға ҳурмат – элга ҳурмат”, “Аёл ва жамият”, “Давлат тили – дўстлик тимсоли”, “Мушоира”, “Офарин” ва яна кўплаб тадбирлар, маданий-маърифий анжуманлар, китобхонлик лойиҳаларида унинг имзоси, сўзи, салоҳияти бор эди.

Унинг ташаббуси билан Ал Форобий туманидаги кам таъминланган юзлаб оилалар учун Наврўз байрамлари ташкил этилди, суннат тўйлари ва хайр-эхсон тадбирлари ўтказилди. Табиий офатлар вақтида уюштирилган “қайғурганлар бағрида бўлиш” тамойилли асосидаги хайрия қарвонлари унинг қалб кенглигидан, инсонпарварлигидан дарак беради.

**МУКОФОТЛАР – ҚАЛБАГА БИТИЛГАН ҲУРМАТ**

Унинг фаолияти, жамиятдаги ўрни кўплаб мукофотлар билан этироф этилган: ҚХА ташаккурномалари, “Бирлик” олтин медали, Қозоғистон Республикаси Таълим ва фан вазирлигининг



Фахрий ёрлиқлари, маҳаллий ҳокимлик ва жамоат ташкилотларининг этирофлари – буларнинг ҳар бири халқнинг чуқур муҳаббати тимсолидир.

Энг муҳими, у юзлаб, минглаб инсонлар қалбиде эзгулик ва меҳр билан ёд этилади.

Ҳаётдан ўтса ҳам, қалблардан ўчмайди

Қозоғистон халқи Ассамблеяси раисининг ўринбосари Марат Азизханов томонидан эълон қилинган таъзия ҳам бу жудодилнинг оғирлигидан дарак беради.

Нуринисо Дўсматова нафақат салоҳиятли мутахассис, балки ўз оиласида меҳрибон она, садоқатли турмуш ўртоқ, марҳаматли буви эди. Унинг ҳаёти, эътиборли фаолияти, меҳнаткаш ва самимий ҳаёт тарзи ортидан нурли ном қолади.

Марҳумаға Яратгандан раҳмат, азадорларға эса сабр ва бардош тилаймиз. Марҳума тарқатилган меҳр ва эътибор таркатган бўлса, энди хотираси қалбларда абадий яшайди.

**Ф. ҚОРАТОВЕВ, жамоат арбоби. З. МҮМИНЖОНОВ, ҚР Ёзувчилари уюшмаси аъзоси. Х. МУХИДДИНОВ, жамоат фидойиси. А. БҮРҲОНБОВЕВ, журналист.**

Мақтаарал тумани, Янги йўл қишлоқ округининг Фирдавсий аҳоли манзилида “Бирдамлик – олтиндан қиммат” мавзuida ҳамжиҳатлик ва тотувликни мустаҳкамлашга бағишланган учрашув ўтди.

Бу ҳақда “Жамоат тотувлиги” ДҚКнинг туман бўлими ижтимоий тармоқдаги саҳифасида хабар қилди.

Унда вилоят “Жамоат тотувлиги” ДҚКнинг туман бўлими раҳбари Азимхан Жўлдасов, Мақтаарал туман оқсоқоллар кенгаши раиси ўринбосари Асқар Елшиев, “Ёшлар имконият маркази” директори Нуркен Ушантаев, туман мавқе маркази мутахассиси Нурислом Юсупов, шунингдек, тожик этномаданият бирлашмасининг фаол аъзоси Тилло Файзиев ҳамда қишлоқ фуқаролари иштирок этди.

Учрашувда қилинган маърузалар – халқ қалбига яқин, юракдан чиққан сўзлар тингловчилар қалбиди чуқур таассурот қолдирди. Тадбир иштирокчилари томонидан миллатлараро муносабатларнинг



аҳамияти ижтимоий жараёнлар ва давлат дастурларининг мазмуни ҳақида теран мулоҳазалар билдирилди.

Йиғилиш якунида Азимхан Жўлдасов сўзга чиқиб,

жамиятдаги тинчлик ва барқарорлиқни таъминлашга ҳар бир фуқаро масъул эканлигини таъкидлади.

Бу учрашувлар фуқароларнинг сиёсий онгини юксал-

тириш, жамиятда тинчлик ва миллатлараро ҳамжиҳатликни мустаҳкамлашда муҳим ўрин тутди.

М. УСМОНОВА.

»» Москва олимпиадасига – 45 йил

## ТУРКИСТОНЛИК М. УМАРОВ ВОЛЕЙБОЛ МУСОБАҚАЛАРИГА ҲАКАМЛИК ҚИЛГАН

1980 йили Москва шаҳрида ўтган XXII ёзги олимпиада ўйинлари жаҳон миқёсидаги спорт анжумани сифатида тарихда қолган.

Волейбол бўйича Бутуниттифоқ даражадаги ҳакам, туркистонлик Мамаш Умаров Москва шаҳрига халқаро ўйинларга ҳакамлик қилиш учун таклиф қилинган. Бунга қадар у уч марта ҳар тўрт йилда бир марта ўтадиган СССР спартакиадасига ҳакамлик қилган. ҚР Президенти Н. Назарбаевнинг кубоги учун 1993-2012 йиллар оралиғида ўтган халқаро турнирда Венгрия, Польша, Хитой Республикасида волейбол ўйинларига ҳакамлик қилган.



Мамаш Умаров 1937 йили 19 декабрда Туркистонда туғилди. Ҳамза номли мактабда ўқиди. Олий маълумотни Алматидagi жисмоний тарбия ва спорт институтида олди. 1958-1998 йиллар оралиғида Туркистон туман ва шаҳар спорт ҳамда жисмоний тарбия қўмитасига самарали раҳбарлик қилди. М. Умаров Ҳамза номли мактабда ўйингоҳ атрофини гувала кесакдан ҳашар йўли билан қўршаш ташаббусини кўтариб, мақсадига эришган.

Шаҳар партия қўмитаси биринчи котиби Р. Ибраевага бир неча марта мурожаат этиб, О. Жарилқапов ўйингоҳини таъмирлаш, Балуан Шўлақ ўйингоҳини ҳашар йўли билан қўриш масаласини ижобий ҳал қилишга эришган. Олим-



пиада чемпиони Б. Саттарханов хотирасига бағишланган халқаро мусобақаларни ташкил этишда хизматлари кўп.

Умр йўлдоши, Туркистон туман марказий кутубхонаси мудираси Зинаида Яковлевна билан Тамара, Дилара, Аркадий исмли олий маълумотли фарзандлар тарбиялаган. Тамара – кўп йиллар М. Жумабаев номли мактабга самарали раҳбарлик қилди. Дилара Шимкентда олий маълумотли шифокор. Аркадий ота изидан бориб, спорт соҳасини танлаган.

М. Умаров Туркистон шаҳрининг фахрий фуқароси, СССР жисмоний тарбия ва спорт соҳаси аълочиси, Қозоғистонда хизмат кўрсатган мураббий, СССР спорт устаси – бундай залворли унвонлар рўйхатини яна давом эттириш мумкин. М. Умаров соғлом турмуш тарзига амал қилди. Касал бўлиб кўрпа-тўшак тор-

тиб ётмади. Ҳаётдан кетиши ҳам спортчиларга хос бўлди. М. Умаровнинг шогирди, ҳамкасби, кўшниси, Ҳамза номли мактаб жисмоний тарбия фани устози Бахтиёр Абдураимов шундай эслайди.

– Устоз Мамаш Умаров билан ҳар оқшом Қазибекбий кўчаси дарвоза олдидаги ўриндиқда ўтириб, спорт янгиликларини муҳокама қилиб, дилдан суҳбат қураддик. Одатдагидек, ўша оқшом эртага яна учрашиш аҳди билан тарқалишдик. Эртаси куни эса Мамаш Умар ўғлининг фонийдан чин дунёга рихлат қилгани хусусидаги машъум хабардан воқиф бўлдим. Унинг ҳаёти ва фаолияти ўзи тарбиялаган юзлаб иқтидорли шогирдлари ютуғида давом этишига ишонаман.

**Хусан УБАЙДУЛЛАЕВ,**  
**Туркистон вилоятининг**  
**ибратли фуқароси.**

**Тасвирларда:** М. Умаров; М. Умаров ҳамкасб шогирдлари билан; М. Умаров – Москвада ҳакамлик пайтида.

***P.S. Мамаш Умаровнинг шогирди, кураш бўйича республика чемпиони Ирискул Сулаймоновнинг қаламига мансуб “Туркистаннинг спорт тарландары” китобида шу соҳанинг машҳурлари, хусусан, Мамаш Умаров ҳаёти ва фаолияти тўғрисида батафсил маълумотлар мавжуд.***

»» Во ажабо!

## ГУЛ БОЗОРИДАГИ ФИРИЎГАРЛИК

Ёшлигимдан наставин гулини жуда ёқтираман. Ҳовлимга шу гулнинг кўчатини ўтқазиш мақсадида Шимкент шаҳридаги “Ёпиқ бозор”дан бир донга кўчатини сотиб олдим. Илдизлари маҳкам қилиб ўралган кўчатни уйга олиб келиб, ўтқазиш мақсадида очдим... Ишонасизми, кўчатнинг илдизи йўқ, қаламча сувли тупроққа ўраб қўйилган экан. Йиғлаб юбордим, сотган одамни роса қаргадим.

Пулимга эмас, ёқтирган гулимга эришолмаганим учун йиғладим. Азизлар, гул кўчатини олаётганда эҳтиёт бўлинг, қараб олинг.

Қадрли “Жанубий Қозоғистон” газетаси тахририяти, илтимос, шу ёзган дардимни газетада чоп этинглар. Ахир гуллар ҳақида қанча ашъорлар битилиб, кўшиқлар куйланади. Уни шундай хўрлаш яхшими? Гул, дов-дарахтларнинг ҳам жони

бор, улар ҳам соҳибидан норизо бўлиб, Аллоҳга илтижо қиларкан, уволи урмасин, яна.

Огоҳ бўлайлик, гуноҳ ишлардан қўркайлик. Кўчат сотган кишининг виждони жигилдонга айланган кўринади, шу йўл билан топган пули буюрармикан?

**Санобар ТУРСУМЕТОВА,**  
**ҚР Журналистлар**  
**уюшмаси аъзоси.**



Тоҳир МАЛИК

## Келинлар дафтарига

(Давоми. Боши ўтган сонларда).

Бешинчи суҳбат:

Агар уялмасанг...



Ҳозирги кунимизда ғарб мамлакатларида оилага муносабат ёмон томонга ўзгариб кетган. Ҳолбуки, аввалги замонларда уларда ҳам оила муқаддас, деб ҳисобланган. Оилага «эркинлик» мартабасининг берилиши жамиятни бора-бора издан чиқаради. Чунки «эркинлик» тушунчаси «нима истасанг қилавер», дегани эмас. Аллоҳ «мендан уялмасанг, нима истасанг қилавер», деб бекорга огоҳлантирмаган. Аллоҳдан уялмادими, демак, ота-онасидан ҳам, қариндошлари, атрофидаги бошқа одамлардан ҳам уялмайди, кенгрок маънода олсак, жамиятдан уялмайди. Уялмادими, жамият олдидаги бурчини унутди. Жамиятқонунларидан юз ўйрган оилалар кўпайса, бу жамиятнинг ҳолига вой эмасми!

Ғарбда бугунги кунда оила бобида бир қанча бузилишлар мавжуд:

- одамни ҳайвондан ажратиб турувчи нарсаси онгли равишда покиза оила қуриш. Оила деганда биз эр ва аёлнинг қўшиливини англаймиз. Лекин эркак билан эркакнинг, аёл билан аёлнинг қўшиливини «оила» деб аташ одамзотни ҳайвонот олами билан теппа-тег қилиб қўймаймими? Бу фикрни иккинчи бор қайта таъкид этишимиз бежиз эмас. Бу ҳолатни ҳайвонот оламига ўхшатяпмиз, аммо ургочи билан ургочининг, нар билан нарининг қўшиливи ҳайвонларда ҳам йўқ. Эркакнинг эркакка интилиши юз йиллардан бери мавжуд, бироқ, жамият бундайлардан нафратланиб келган, қўлайишига йўл қўймаган. Лут алайҳиссалом қавмларига юборилган офатни эсласак, қифоя қилар? Эндилиқда эса бундай «оила» қуришга турли мамлакатларда қонун йўли билан рухсат беришга интилиш бор. Энг даҳшатлиси шундаки, уларга бола боқиб олишга ҳам рухсат этилапти. Улар боқувидиға бола қандай тарбия кўради, ким бўлиб етишади?

- оила қурмай якка-ёлғиз яашагга интилиш кучли. Маълумотларга кўра, жаҳон бўйича америкаликлар бу соҳада ҳам пешқадам экан. Эркакнинг ёки аёлнинг оила қуришдан бўйин товлаб, ёлғиз яшаши ҳам оқибатда жамиятни жар ёқасига келтириб қўяди. Илгарилари собиқ иттифоқнинг европа қисмида шундай одамлар рағбатлангирларди. «Мать одиночка» деганлари бўларди. Яъни, боланинг онаси бору отаси йўқ. Бу хонимча мутлақо оила қурмасдан кимдандир бола ортирган. Шу учун унга навбатдан ташқари уй беришгача борганлар. Мана энди Россияда аҳоли кескин камайиб кетаяпти, деб бонг уриб ўтиришибди. Утмиш ғарб файласуфларидан Энгельс хотинин эрга бўйсунуши фақат иқтисодий қарамликка боғлиқ. Яъни, эр моддий таъминотчи, агар хотин ўзини ўзи таъминлай олса, эрга бўйсунмай қўяди, деган ғояни илгари сурган эди. Бу ғоя орадан юз йил ўтиб, ўша томонларда ўз исботини топаяпти. Лекин бу ғояни ҳаётий ҳақиқатга асосланган, деб бўлмади. Қайсики оилада рухий-маънавий тушқунлик ҳукмрон бўлса, бу ғоя ҳам яшайди. Танҳо яшовчи одамнинг (у хоҳ эркак, хоҳ аёл бўлсин) ҳаёти, қанчалик яхши таъминлаганидан қатъиназар, қашшоқликдан иборатдир.

- биз томонларда оила бузиладиган бўлса, эр талоқ қилади ёки хотинни ташлаб кетади. Европада эса акиси: эрни хотин ташлаб кетади. Русларда «Брошенный муж» деган ибора бор. Уларда хотини ташлаб кетган эр нима қилиши керак, деган муаммо ҳам мавжуд. Хотин эрни ташлаб кетди, дегани отасининг уйига бориб турибди, дегани эмас. Хотин эрни нима учун ташлайди? Севмай қолгани учун. Уларда севиб қолиш ҳам осон, севгидан айниш ҳам осон. Хотинга бошқа эркак ёқиб қолса, эрига: «ранжимагин, мен бошқани севиб қолдим», деб кетаверади. Бу ўринда оила фақат бузуқлик туфайли бузилади.

Биринчи ҳолат ҳам, иккинчи-учинчиси ҳам юқумли хасталикка ўхшайди. Тез тарқалади, давоси эса ғоят мушкул. Оқибат эса миллатнинг йўқ бўлиб кетишигача олиб бориши ҳеч гап эмас. Бизда ҳам бу касаллик нишонлари кўриниб қоляпти. Зийракликни бой берсак, кечикиб қолишимиз мумкин.

Қишлоқларда сезилмайди, аммо шаҳарларда эрдан ажралганидан кейин «агар эр шунақа бўлса, бети қурсин, жонимни қийнамай, эрсиз яшайман», деб, бошқа турмуш қурмай яшовчи аёллар сони камаяётгани йўқ. Биз бу аёлларни бузуқликда айбашдан ийроқмиз. Лекин оила билан яшасалар, ўзлари учун ҳам, жамият учун ҳам дурустроқ бўлади. Яширишнинг ҳождати йўқ, ким «фалончининг қизи эрдан ажраб кўп қаватли уйда ёлғиз яшаркан», деб эшитса, хаёлига дарров шум фикр келади. Қўшни аёллар ҳам ёлғиз яшовчи хотинни тинмай кузатишади, ғийбат қилишади. Агар бIRON бегона эркакнинг меҳмон бўлганини билишса, тамом, «достонлар» битилаверади.

Олтинчи суҳбат:

Зурриёт

Турмуш қурмай ёлғиз яшаш ғарбликлар учун янгилик эмас. Насроний дини тобелари орасида таркидунёчилик одати бор. Насронийлар бунинг учун махсус дайр(роҳиблар яшайдиган монастыр)лар қурадилар. Роҳибларга уйланиш, роҳибларга турмушга чиқиш ман этилади. Улар «Уйланиш ва фарзанд орттириш кишини Ҳақ хизмати-дан ва Худога яқин бўлишдан четлаштиради», деган ақидага асосан турмуш қурмасликни қомилликдан деб билишади. Оила қуриш, унинг ташвишлари қаршисида эркин яшаш роҳати туради. Агар одамзот ихтиёрий ўзида бўлганида шу роҳатдан бошқасини истамаган бўларди. Аммо Аллоҳ эрнинг ҳам, аёлнинг ҳам мижозига шахватни қўшиб берганки, ана шу шахват тақозосига кўра, улар бирга бўлишни истаб, оила қурадилар. Шу сабабли башарият насли Аллоҳнинг иродасига қара охиратгача сақланиб қолади. Шахват тақозоси деганимиз бир сабаб. Аслида оила қуришни, насл қолдиришни Аллоҳ ирода этган, бандаларга фарз қилган. «Бақара» сурасида бундай маъноларни ўқиймиз: «Хотинларингиз сизларнинг экинзор ерларингиз бўлади (бу билан Қуръон эр-хотиннинг яқинлашувидан биринчи муддао – фарзанд талаб қилиш эканига ишора қилмоқда). Зироат ерлари уруғ сепганди самара беради. Хотин ҳам экинзордир ва ҳосили – фарзанд. Бас, ўз хотинларингиз билан фарзанд ниятида алоқа қилинг ва келажда ўзларингиз учун фарзанд тарбияланг. Аллоҳдан қўрқинг, унинг қаҳрига илминангиз. Бас, туғилиш ва висол учун берган қувватни бекор қолдирманг ва зое қилманг. Эй Мухаммад, саодат муждасини (жаннат хушхабарини) иймонлиларга бергин».

Демак, уйланиш ва оила қуриш иймон талабларидан бири экан. Буни дунёвий мисол билан шарҳласак: бир одам ижарага ер олди, деҳқончилик қиламан, дегани учун унга банк маблағ ҳам берди.

(Давоми бор).

|                                                                                                                                                                                                                             |                                                                                                                                                                                                                                                                                                                                                                                                                                                                          |                                                                                                                                                                                                                                                                                                                                                                                                                                                                                                                                                                                              |                                                                                                                                                                                                                                                                                |
|-----------------------------------------------------------------------------------------------------------------------------------------------------------------------------------------------------------------------------|--------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------|----------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------|--------------------------------------------------------------------------------------------------------------------------------------------------------------------------------------------------------------------------------------------------------------------------------|
| <p><b>Директор – Бош муҳаррир учун</b><br/><b>Муроджон АБУБАКИРОВ.</b></p> <p>Бош муҳаррир ўринбосарлари:<br/><b>Муроджон АБУБАКИРОВ.</b><br/><b>Авазхон БҮРҲОНБОВ.</b></p> <p>Масъул котиба – <b>Шаҳноза УСМОНОВА.</b></p> | <p><b>Масъул шахслар:</b></p> <p>Туркистон, Саверон – <b>Шомирза МАДАЛИЕВ.</b> +7701-610-51-22<br/>Қазигурт – <b>Хуршид ҚҮЧҚОРОВ.</b> +7701-447-37-42<br/>Сайрам – <b>Зокиржон МҲМИНЖОНОВ.</b> +7702-278-96-90<br/>Тулкибош – <b>Мунира САЎДУЛЛАЕВА.</b> +7747-144-60-71<br/>Жетисай, Мақтарал – <b>Мухтабар УСМОНОВА.</b> +7701-257-36-97<br/>Келес, Саригоч – <b>Малика ЭЛТОЕВА.</b> +7702-841-78-82<br/>Кентов, Сўзёқ – <b>Рўзиохун МАДАЛИЕВ.</b> +7708-824-20-97</p> | <p>Муассис – Туркистон вилояти ҳокимлиги.<br/>Мулк эгаси – “Жанубий Қозоғистон” вилоят ижтимоий-сиёсий газетаси тахририяти” масъулияти чекланган биродарлиги.</p> <p>«Мақолалар, эълон ва билдирувлардаги факт ҳамда баёнларнинг тўғрилиши учун муаллифлар, реклама ва эълон берувчилар масъулдир.<br/>«Фойдаланилмаган мақолаларга ёзма жавоб қайтарилмайди.</p> <p>Газета ҚР Маданият ва ахборот вазирлиги томонидан 2020 йил 21 апрелда рўйхатга олинди, КС34VPRY00022503 гувоҳнома берилган.</p> <p>“ERNURprint” МҲБ босмахонасида чоп этилди, Шимкент шаҳри, Т. Алимқов кўчаси, 22.</p> | <p><b>МАНЗИЛИМИЗ:</b><br/>160000, Шимкент шаҳри,<br/>Тауке хан шоҳқўчаси, 49-уй, 3-қават.<br/>+7778-618-39-05.<br/><i>Электрон почта: janubiy@inbox.ru</i></p> <p>Нашр кўрсаткичи – 65466. Адади – 10500 нуска.</p> <p>Бурчмак 1665. Навбатчи муҳаррир: Наргиза МАВ.ЮНОВА.</p> |
|-----------------------------------------------------------------------------------------------------------------------------------------------------------------------------------------------------------------------------|--------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------|----------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------|--------------------------------------------------------------------------------------------------------------------------------------------------------------------------------------------------------------------------------------------------------------------------------|

Қозоғистон Республикасида тарқатилади.